

Minisitiri w'Ibidukikije mu Burundi yishwe arashwe

Yanditswe kuya **1-01-2017** na **Tuyisenge Jean Pierre**

<http://www.igihe.com>



Minisitiri Ushinzwe Amazi, Ibidukikije n'Igenamigambi mu Burundi, Emmanuel Niyonkuru, yarasiwe mu Mujyi wa Bujumbura

Minisitiri Ushinzwe Amazi, Ibidukikije n'Igenamigambi mu Burundi, Emmanuel Niyonkuru, yarasiwe mu Mujyi wa Bujumbura n'abantu batanzwe ahagana saa Sita na 45 z'ijoro zo kuri iki Cyumweru tariki ya mbere Mutarama 2017.

Umuvugizi w'Igipolisi cy'u Burundi, Pierre Nkurikiye ku rukuta rwe rwa Twitter yavuze ko umugore wari uri kumwe na we yahise atabwa muri yombi kugira ngo akorerweho iperereza.

Ati " Niyonkuru w'imyaka 54, yishwe n'umuntu wari ufite imbunda, ubwo yari mu nzira agana iwe mu rugo i Rohero ahagana saa sita n'iminota 45."

Niyonkuru yinjiye muri Guverinoma nyuma y'uko Perezida Nkurunziza atangaje ko aziyamamariza kuyobora u Burundi kuri manda ye ya gatatu itaravuzweho rumwe akaza no kuyitorerwa mu 2015.

Perezida Nkurunziza na we yatanze ubutumwa bwo kwihanganisha uyu muryango n'Abarundi bose muri rusange abizeza ko umunyacyaha azahanwa.

Kuva u Burundi bwakwinjira mu bihe by'imvururu, abasaga 500 bahasize ubuzima abandi 300,000 bahunze igihugu kuva muri Mata 2015, nkuko Umuryango w'Abibumbye ubitangaza.